

Opel, Adam unn onnern Leit

Die letzde Daache war in Flerschem joo ebbes los, unn nadierlich warn mir aach debei, de Schorsch unn ich.

Oogefonge hotts om ersde Mai unne om Moo, als de Adam Opel - no ja, es war en Schauspiller, der den noochgemacht hott – mit Gefolge iwwer de Moo kam, nit im Nache, naa, mett sooner Motorfähr. Vom alte Opel hawwe merr nit vill gesehe, weeche dene gonze Offizielle, die sich beim Näherkumme vor den gestellt hawwe, weil doo werrn doch Fotos gemacht unn de Opel kennt joo jeder.

Om Somsdaach sinn merr dann uff de mittelalterliche Markt gonge, de Schorsch, soi Kättche unn ich. Mir hawwe uns alles genau oogeguckt, weils im Mittelalter aach so gewese soi soll. Gut gefalle hott uns die Schmiederei, weil dort hott de Monn hinne gestonne unn nor geguckt unn soi Fraa hott de große Hommer geschwunge, die hatt vielleicht en Schlach druff! En dolle Blösebalch hatt die, mett Ledder als Bälch, mett dem hottse dess Schmiedfeier gonz schee oogeheizt.

Unn dann warn merr bei de Filzerei unn hawwe gefroocht, wie dess geht mettem Filz unn hawwe gelernt, dass Woll in Seifewasser Filz gibt: Erst werd geschmiert unn dann isses Filz, awwer dess iss joo heit iwwerall noch so.

Die Filzerin dort hott mich verabschied mett dene scheene Worte: Gehabt Euch wohl, Recke! Dess hott merr gefalle unn ich habb dem Schorsch gesacht, du, merr duen jetz aach e bisje mittelalterlich babbele. Dorscht hatte merr awwer aach unn doo sinn merr on den Stond mettem Gersdesaft gonge unn hawwe uns ooner bestellt. Dess Kättche war die gonz Zeit newer uns, awwer jetz hottse e paar Meter weit weg gestonne unn hott mett ihre Schweecherin geschwetzt.

Newer uns on de Thek steht so e blond historisch Mägdelein unn trinkt aach en Gersdesaft, doo spricht de Schorsch se oo: Mein Fräulein, Ihr tragt ein hübsch Gewand. Habt Ihrs mit Euren feinen Fingerlein geschneidert? Grad als dess Mädsche Ja genickt hott, kimmts Kättche unn stellt sich hinner de Schorsch, der merkts awwer nit unn babbelt weider: Hochedle Frau, ich bin der Ritter Adam und hier in Flaridesheim als großer Mechanikus bekannt. Ich möcht Euch gern mein Nähgerät zeigen - darf ichs wagen? Ihr werdet voll der Minne sein!

De Schorsch hotts noch nit richdich eraus, doo faucht dess Kättche von hinne: Ritter! Mechanikus! Nähgerät! Jetz iss Schluss mettem Minnegesang in de Fremde, jetzt gehts hoom.

Doo iss moin Kumpel schee erschrocke unn sacht gonz leis: Ich muss awwer de leere Becher noch abgewwe, ferr den krieg ich fünf Silberlinge zurück. Unn außerdem habb ich bei dem Mädsche doch nor ‚De Opel unn soi Nähmaschin‘ gespillt.

Nix, sachts Kättche, dies tönern Gefäß ist Zeugnis Eurer Schuld.
Ihr werdet ihn mit Tränen füllen, da ich Euch in de Senkel stell. Es sei
denn, Edler Ritter, dass Ihr zur Buße mir noch heut den Adam spielt!

Eiern Honnes